

Bájkkeavijssa NuorttaSálto

«Girde goasskem, girde»



BERIT VALBERG



TORE HESTBRÅTEN



ROLF STEFFENSEN



Rolf Steffensen ja Tore Hestbråten libá tæksta-tjálle mánájmusikalan mij ávddánbuvteduváj Bådådjo Oajvvegirkkon sådnábiejve iehketbiejve.

Tæksta:
Kitty Skapalen
Jårggálibme:
Divte Media AS

Bådådjo Oajvvegirkko jáhkkoáhpadasprosjektajadediddje Berit Valberg rávvij tevstav musikalaj hábmerárroguoktás, madi dábdos sáme tjuojadiddje Frode Fjellheim musihkav dasi biejjaj. Musikala tiebmá lij risstadibme sámijis, ja musikalla dramatiserij histávrváv gáktu girkkko julevsáme guovloj sámijt niejdedij ja dárojduhtij, állu Thomas von Westena biejjijis gitta mañemus lågev jagijda. Láhpadijmen goabdes vatteduváj, symbávllán doajvvuj ádá ásadibmáj ja sábadussaj.

- Riek tjábbe lij, ja máná ham lidjin nav smidá, javllá dudálasj tækstatjálle Tore Hestbråten. Ávdep tjavtja sán tjállegádjij, ja tjálij dálvev tjadá gitta snjilltjamánnuj.

Dan mañjela lij regissóra Valberga vuorro mánájkávrváj hártjidallat.

- Sán le buoragit barggam, miejnne Hestbråten. Iesj sán Finnskogenijs boahá. Valla le moadda jage berustam sáme birrusis.

- Muv mielas le suohtas sáme birrusa ulmuttjij siegen liehket. Sáme li ham luonndoulmuttja, sáemmi lev mán, javllá sán. Musikalla skávlláohppiida ávddánbuvteduváj oajvvegirkkon mánnodagá.

- Buorre le gá vuosádus ienep ulmuttjijda vuoseduvvá, aj skávllájn, ja iehket sáhká ienep mielagiddis ja áhpadibmen sjáddá, gá mánájs ja nuorajs mánájs ja nuorajda ávddánbuvteduvvá. Sávvat dát máhtá bisoduvvat ja vil ienep aktijvuodajn aneduvvat, ja ietja sajijn gá dássju Bådádjon, javllá sán.

Rávvidusbarggo

Vuosádus lij rávvidusbarggo Bådádjo oajvvegirkko jáhkkoáhpadasprosjektaj, ja dat guoskaj moadda mánájkávrváj aktan badjelasj 100 máná, profesjonallasj tjuojadiddje, lávle ja ietjá kultuvrbargge. Niellja kávrá Bådádjo oajvvegirkko lávllomskávlás geldulasj birrusav dahkin oajvvegirkkon sådnábiejve iehketbiejve, gá nágin tjuohte ulmuttjijda musihkkaspelav ávddánbuktin. Dirigánnat ja prosjektajadediddje lij kantor Berit Valberg Bådádjo oajvvegirkkon. Valberg le moadda jage Háberin organisstan barggam.

Gáktu ávdep suttojt gádodit

Vuona girkkko sábadusprosjekta julevsáme guovlon bivdij aktisasjarggij Oarjje-Hálogalánda bispadommerádjij konferánsajin Ronvik girkkon Bådádjon

mánnodagá, gánná tiebmá lij jur “Mij rávkaduvvá girkkos ráfe ja sábadusáv ásadittjat, bájkálatattjat ja globalalattjat?” Girkkko gálmájahkásasj sábadusprosjekta baktu julevsáme guovlon (2005-2007) moadda gássjelis ja riek hástalis tjuolma tsieggiduvvin. Nubbe dájs le tjanádum girkkko misjávnnádájmaida. Sáme mijá guovlojn risstaduvvin garras ládadallamijn sijá jáhkos ja iellemvuojnos 1720-jagijn. Sábadusprosjekta baktu tjuottjoduvvá sáme jáhkko ja iellemvuojno “demoniseriduváj” girkkos. Dát demoniserim sáme álmuga vuodulasj identitehtav vaháhtij, mij vilá sáme sebrudagán dábddu.

Dán duogátjijn le ádá oajvvegatjálvis ájggeguovddelis: Gáktu galggá ráfe- ja sábadusáhtsámin girkkko uddni ietjas vievrev háldadit majt iesj dagáj misjávnnádájmaida? Girkkko iesj jáhkka le riek ájnas gatjálvisáv buktet, ij dássju mijá sáme-dáro aktijvuodan, valla ietjá sajijn vearáldin gánná risstalasj girkkko le nuppij áskoht ja jáhkko-systemajt enustallam misjávnnádájmaida.

Misjávnná sisadno

Sáme misjávnnáhistávrváj vuodon, ja dan vájkkudusáj, miejnne ájgge le állidum girkkuj ja misjávnnáorganisasjávnnáida ienebuv ja tjelggasappot misjávnná nievres bielij birra sáhkadi. Gáktu galggá girkkko ja organisasjávnná, váni ietjádij jáhkov ja kultuvrav mieddet, ietjas oasev jáhkko- ja árvvobisodiddjen ja ávddánahttemo-assálassten gátsedit, vearáldin mij vilá globaliseriduvvá?

Nágin lágádallijis lidjin duola dagu stiftskapellan Torgeir Norwich Trámsás guhti tjalmostahtij girkkko demoniserimav sáme jáhkos. Noajdde ja tjálle Ailo Gaup Oslos sáhkadij friddjavuoda birra mij de la boahám ja Pastor Dr Mike Adams, njunnusj organisasjávnnás Coloured Khoisan Reformation, Cape Town, Oarjje-Afrikán vuosedij viessomav ja gospelav vajálduhtedum stádan Atlantis. Prosjektajadediddje Heidi Strand Mathisen Háberin sáhkadij guládallam ja sábadusperspektijvaj birra jáhkkoáhpadijmen guovtekultuvralasj Háberin ja biskoahppa Tor Berger Jørgensen tjalmostahtij gáktu girkkko uddni galggá vievrev háldadit majt iesj le dahkam.